

Siunnersuummut nassuaatit

### Nassuaatit nalinginnaasut

#### 1. Aallaqqasiat

Nunalerinermik inuussutissarsiuteqarnermut siuarsaanissamut maleruagassat atuuttut nunalerinermik inuussutissarsiornerup siuarsarneqarnissa pillugu Inatsisartut inatsisaanni nr. 6-im, 2. december 2009-meersumi aalajangersarneqarput.

Siunnersuutip matuma Inatsisartut inatsisaat matuma siuliani taaneqartoq taarsissavaa.

*Kalaallit Nunaanni nunalerinermik inuussutissarsiuteqarneq aamma imminut pilersornermik annertusititsineq*

Kalaallit Nunaata inuussutissalerinermi imminut pilersornerulernissa Naalakkersuisunit kissaatigineqarpoq, tamatumunngalu atatillugu nunalerinermik inuussutissarsiuteqarneq pingaarutilimmik inissismavoq. Kalaallit Nunaanni naatitat neqillu, nunatsinni nerisassatut annertoorsuit tikisinneqartarput. Nunalerinermik tunisassianik, soorlu savaaqqat neqaannik, nersussuit neqaannik, naatsianik naatitanillu tunisassiornerup annertusitinneratigut inuussutissat taamaattut tikisinneqartartut ikilisinneqarsinnaapput. Tamatuma peqatigisaanik nunalerinermi ukiuni arlalinni savaaqqanik tunisassiornerup annikilliartornera misigineqartarpoq. Imminut pilersornerup annertunerusumik aallunneqalernissaanik politikkikkut kissaateqarnermut peqatigitillugu, tamanna 2020-mi Naalakkersuisuuusut Nunalerinermut Periusissiaq 2021-2030-mut akuersineranik kinguneqarpoq, taannalu maanna Naalakkersuisuuusut ingerlateqqippaat. Periusissami Kalaallit Nunaanni inuussutissanik, kalaallit nunalerineranni tunisassiarineqartunik imminut pilersornerup annertunerulernissa pingaarnertut anguniarneqarpoq.

Imminut pilersornissamut suliniutissanit pitsaasunit illup iluani ikiorsersorluni naatitanik naatitsisarfinnik minnerusunik ("indoor farming") aallarnisaasoqartoq takuneqarsinnaavoq. Tamanna Kalaallit Nunaanni annikitsumik ingerlanneqarpoq, kisiannili ilimanarpoq, siunissami Kalaallit Nunaanni naatitanik imminut pilersorneranik annertusititsiniarnermi tunisassiorneq pingaaruteqarnerusutut inissismalersinnaasoq. Siunnersuut ilaatigut tamatumunnga inuussutissarsiutinik siuarsaanermut aningaasaliissutinik tunniussisinnaalernissamik imaqrarpoq.

Aamma siunnersuut immami naatitsisarnermut inuussutissarsiutinik siuarsaanermut aningaasaliissutinik tunniussinissamut periarfissanik imaqrarpoq, taakkununngalu qeqquasanik

naatitsisarneq piaasarnerlu, kiisalu assersuutigalugu aalisakkanik uillunillu nakkutigisamik tukerartitsisarnerit ilaatinneqarput. Maannarpiaq Kalaallit Nunaanni immamik naatitsisarnermik inuussutissarsiuteqarnermik ingerlataqartoqanngilaq, kisiannili suliat arlallit aallarnisarneqarput.

Nunani allani aalisakkanik tukerartitsisarneq annertuumik ingerlanneqarpoq, kisiannili Kalaallit Nunaanni pissutsit pitsaanerpaanngillat. Kisiannili qeqquasanik piaasarneq naatitsisarnerlu periarfissarpassuaqarpoq. Qeqquusat tunisassianut assigiinngitsorpassuarnut atorneqartarput, inuussutissaniit uumasunut nerukkaatissanut, naggorissaatinut, plastikkiliornermut aammalu pinnersaasiornermut. Kalaallit Nunaanni sumiiffinni sikusanngitsuni qeqquasanik naatitsinissamut pissutsit pitsaasuupput, aammalu qeqquusat sineriak sinerlugu naasartut amerlasoorsuupput. Taakku Kalaallit Nunaanni imminut pilersornermik annertusititsisinnaapput, kisiannili aamma avammut nassiussisarnermi atorneqarsinnaallutik.

Immami naatitsisarneq siunnersummut matumunnga ilanngunneqarpoq, naak maannarpiaq Kalaallit Nunaannut siaruaneqarsimangikkaluartoq, kisiannili siunissami immami naatitsisarnerni suliassaalersussanut siuarsanissaq periarfissaqalerpoq.

*Nunalerinermik inuussutissarsiuteqarneq inuussutissarsiutillu allat*

Nunalerinermik inuussutissarsiuteqarneq Kalaallit Nunaata kujataani pingaaruteqarpoq. Inuussutissarsiutaannaanngilaq, aammali kinaassutsip ilisarnaataanut ilaavoq. Kalaallit Nunaanni takornariaqarneq nunalerinermik attuumassuteqarluinnartuuvoq, takornariat qallunaatsiaat nunalereriaasitoqaannik nunalerinermillu nutaliaasumik, ullumikkut pissutsit nunarsuarmi sumiiffinnit allaanerusut atorlugit ingerlanneqartumik misigisaqarniarlutik tikittarmata. Taamaattumik nunalerisut amerlasuut aamma nunalerinermik saniatigut takornarianut sammisaqartitsisarput. Aamma attaveqaasersuutit nunalerisut pilersitseqataaffigisaat aserfallatsaaliveqataaffigisaallu takornarianit annertuumik iluaqutigineqarput.

Kalaallit Nunaanni inuussutissalerinermik ilinniarfik Narsamiippoq, taannalu Kalaallit Nunaata kujataani inuussutissalerinermi nutaaliornerup iluani nukittuunik tunuliaqutsiivoq, nunalerisut najuunneranni inuussutissanik tunisassiornermi tunisassiassat assigiinngitsut tunngaviliimmata.

Kalaallit Nunaata kujataani nunalerinermi nunalerisut ingerlasut kisimik suliassaqartinneqanngillat, kisiannili aamma inuussutissarsiorfinnut allanut, nunalerisunik sullisisunut, soorlu mekanikerinut assartuussivinnullu, takornariaqarnermik inuussutissarsiuteqarnermut aammalu Narsami toqoraavimmut, illoqarfimmi suliffeqarfijt annersaannut suliassaqartitsivoq. Nunalerinermiit tunisassianik piareersaasarnernik

ineriartortitseqqittarnerit ilutigalugit, Kalaallit Nunaata kujataani suliffissat suli amerlanerusut pilersinneqarsinnaapput.

### *Siunnersuummi siunertaasoq*

Siunnersuummi nunalerinermik inuussutissarsiuteqarnerup piujuartitsiviunerusumik ineriartortinneqarneranut suleqataanissaq, aammalu inatsisit ersarinnerulernissaat siunertarineqarpoq. Aamma siunnersuut Kalaallit Nunaanni inuussutissanik imminut pilersornerulernissaanut ineriartortsinermut tapertaanissaq siunertarineqarpoq.

Inatsit ersarinnerulersinniarlugu siunnersuut inatsisitut sinaakkutissatut ilusiligaavoq, tassanilu qanoq iliorluni inuussutissarsiutinik siuarsaanissamut aningaasaliissutinik tunniussisoqarsinnaaneranut sinaakkutissat aalajangersarneqarput, kiisalu teknikkimut tunngassuteqarnerusut nalunaarutinut nuunneqarlutik.

Siunnersuut nunalerinermut inuussutissarsiutinik siuarsaanissamut maleruagassanik, annertunerusumik allannguissanngilaq. Inuussutissarsiutinik siuarsaanermi aningaasaqarnermut sinaakkusiussat maannamut aningaasanut inatsimmi aningaasaliissutit aqutigalugit aalajangersarneqartassapput.

Siunnersuut Naalakkersuisut Nunalerinermut Periusissiaat 2021-2030-mik atulersitsilernissamut tapertaassaaq.

Siunnersuut pingaartumik nunalerinermut periusissiami anguniakkanik 1-imik, 4-mik aamma 8-mik kivitseqataassaaq.

- *Anguniagaq 1 – savaaqqat 28.000-t toqtassat*  
Siunnersuut aqqutigalugu pingaartumik anguniakkat ilaattut inatsisissaq nutaaq, nunalerifinnik tigusinissat imaluunnit nutaanik pilersitsinissat pisariinnerulissapput. Siunnersuutigineqarpoq, nutaamik pilersitat aamma inuussutissarsiutinik siuarsaanermut aningaasaliissutinik pissarsisinnaalissasut.
- *Anguniagaq 4 – Nunalerinermik inuussutissarsiorterup imminut akilersinnaanerulernissaa*  
Siullermik siunnersuut anguniakkat ilaattut inuussutissarsiutinik siuarsaanissamut inatsit iluarsaaneqarnissaanut periarfissiissaaq.

Aappaattut aamma anguniakkap ilaatut ingerlatat mikisut, savanik piaqqiortunik 400-t inorlugit uumasuutillit 2030-mi annerpaamik 20%-tiinnanngortinnissaat anguniarneqassaaq.

Tamanna ingerlatat, inuussutissarsiutinik siuarsaanermut aningaasaliissutinik pissarsisinnaasut angissusissaasa minnerpaaffissaannik piumasaqaateqarnermik

atuutsitsilernissamik siunnersuuteqarnikkut pivoq.

Pingajuattut aamma anguniakkat ilaattut nukissiuutinik ataavartunik atuineq annertunerulersinneqassaaq, inatsisisstatut siunnersummi nukissiutinut ataavartunut inuussutissarsiutinik siuarsaanermut aningaasaliissutinik tapiissutitalinnik tunniussisinnaaneq periarfissinneqarmat.

Sisamaattut siunnersummi anguniakkat ilaattut nunaleriffinnik arlalinnik piginnittuunissamut periarfissamik atuutsitsisoqalissaq, siunnersummi nunalerivimmut ataasiinnarmut tapersiisinnaanermut killiliineq atorunnaarsinneqarmat..

- *Anguniagaq 8 – Aqtsinikkut tunngaviusut nutarterneqarnissaat*  
Siunnersummi anguniakkat ilaattut nunalerisut akiitsuisa isumagineqarsinnaanissaannut periarfissiisoqarpoq, taamaalillunilu akiitsut nunaleriffimmik ineriertortitsinermut akornutaasinnaajunnaassapput.

## 2. Siunnersummi immikkoortut pingaarerit

### 2.1. Inatsisit atuuttut

Nunalerisunut inuusutissarsiutinik suarsaanissamut inatsit atuuttoq tassaavoq nunalerinermik inuussutissarsiorterup siuarsarneqarnissaa pillugu Inatsisartut inatsisaat nr. 6, 2. december 2009-meersoq. Inatsisartut inatsisaata taassuma ataaniippuit inuussutissarsiutinut tapersiissutit pillugit Namminersornerullutik Oqartussat nalunaarutaat nr. 12, 12. december 1984-imeersoq, ernianut akinik aalajangersaaffiusoq aammalu taarsigassarsinermut piumasaqaatinik allanik maleruagassiuffiusoq kiisalu nunaleriffinnik tigusinermut, nutaanik pilersitsinermut aallartitseqqinnerullu tapiissutit pillugit Namminersorlutik Oqartussat nalunaarutaat nr. 20, 5. september 2016-imeersoq.

Nunalerineq ataatsimut isigalugu nunalerineq pillugu Inatsisartut inatsisaat nr. 5, 2. maj 1996-imeersoq, kingusinnerusukkut allannguiteqartinneqartoq, kikkut nunaleriffinnik ingerlatsisinnaanerinut sinaakkusiisoq, aammalu ilaatigut nakkutilliinermut ataatsimiitaliamik Nunalerinermullu Siunnersoqatigiinnik pilersitsinermut tunngavigineqartoq naapertorlugu ingerlanneqarpoq. Nalunaarusiani taassuma ataaniittuni nunalerineq, tassungalu ilangullugit ivigartortitsisarnerup annertussusia nerukkaatissanullu piumasaqaatit sukumiinerusumik maleruagassiuffunneqarput. Nunalerinermi ineriertortitsinermik siuarsaaneq pillugu Namminersornerullutik Oqartussat nalunaarutaat nr. 26, 22. Juni 2001-imeersoq sulianut, nunalerinermik inuussutissarsiuteqarnermik ineriertortitsiviusinnaasunut tapiissuteqarnissamut periarfissiivoq.

Taamatuttaaq nunalerinermik inuussutissarsiuteqarneq uumasut illersugaanerat pillugu  
Inatsisartut inatsisaannut nr. 25-mut, 18. december 2003-meersumut ilaatinneqarput.

## *2.2. Siunnersuutip imai*

Siunnersuummi Naalakkersuisut inuussutissarsiutinik siuarsaanissamut aningaasaliissutinik taarsigassarsiatut imaluunniit toqqaannartumik tapiissutitut, nunalerinermi ingerlatsinermut aningaasaqarnermik pitsannguisinnaasutut, aammalu siunissamut ungasissumut piujuartitsiffiusumik tunisassiornermik angusaqarfiusinnaasutut, Kalaallillu Nunaata imminut pilersorneranik annertusititsisinnaasutut tunniussisinnaanerannut sinaakkutissat aalajangersarneqarput.

Siunnersuummi aaqqissuussinermi atuuttumi pineqartunit annertuut ingerlateqqinnejqarput, tassanilu Naalakkersuisut ukiumoortumik aningaasanut inatsisit tunngavigalugit nunaleriffinnut inuussutissarsiummik siuarsaanissamut aningaasaliissutinik, pingaartumik piumasaqaatit oqinnerusut assigiinngitsut aqqutigalugit tunniussisinnaanissamut periarfissaqartinneqarput.

Siunnersuummi Naalakkersuisut Nunalerinermut Perusissiaat 2021-2030-p atulersinnissaanut tapersiinissaq pingarnertut siunertaavoq. Tassanilu nunalerinermik inuussutissarsiuteqarnerup nukittorsarneqarnissaa, taamaalillunilu inuussutissarsiortut inuussutissalerinermi imminut pilersorsinnaanerup annertusinissaanut. Siunissamilu aningaasaqarnikkut nammineerluni ingerlalernissaanut kivitseqataanissaat pingarnertut aallunneqassaaq.

Tassalu inuussutissarsiutinik siuarsaanissamut qinnuteqaatinik naliliinermi, periusissiami anguniakkat inassuteqaatillu qinnuteqaatip akuerineqarsinnaaneranut tamakkiisumik naliliinermut ilaatinneqassapput.

Aamma periusissiami allassimavoq, Kalaallit Nunaanni nunalerinermi Namminersorlutik Oqartussaniit tapiissutit tapersiisarnermilu aaqqissuussinerit pisariaqartinneqarluinnartut. Nunalerisunit ikittuaraannaat niuernermut piumasaqaatit atorlugit aningaasaqarnikkut naammassinnissinnaanissamut naammattunik peqarput. Taamaattumik nunalerisut imminut akilersinnaasumik suliaqarnerisa annertusarneqarnissaa anguniagassatut pingaaruteqarpoq.

Maannarpiaq inuussutissarsiortut Kalaallit Nunaanni aningaaseriviit aqqutigalugit nunaleriffimminnut aningaasalersuinissamut periarfissaqanngillat. Nunalerisut aningaasaqarnerinik pitsannguineq aamma pisortat tapeeriaasiat ersarinnerusoq aningaaseriviit kalaallit nunaleriffiinut aningaasaliinissamut soqtiginninnerannik annertusititsisinnaavoq.

Taamaattumik siunnersuummi tunngavissaq pingaarutilik tassaavoq, inuussutissarsiutinik siuarsaanissamut aningaasaliissutit pitsaanerpaamik, aammalu siunertanut pitsasunut, nunaleriffinnut tamanut Kalaallillu Nunaannut tamarmiusunut iluaqutaasunut atorneqarnissaat.

Aalajangersimalluinnartumik tamanna ingerlatsiviup siunertat pingarnerit tunngavigalugit qinnuteqaatinik naliliisarnissaanik, taamaalillunilu inuussutissarsiutinik siuarsaanissamut qinnuteqaatit akuerineqarnissaannut atatillugu piumasaqaateqarsinnaanerinik piumasaqaateqartarnissaannillu isumaqarpoq. Assersuutitut aalajangersimasutut oqaatigineqassaaq, nersutinik piaqqiortunik pisinissamut atatillugu inuussutissarsiutinik siuarsaanissamut atugassanik qinnuteqartoqartillugu, piaqqiortitsinermi pilersaarummut peqataanissap piumasaqartassasoq.

### **3. Pisortat aningaasaqarnerinut allaffisornerinullu kingunerisassat**

Siunnersut maannarpiaq pisortanut kinguneqartussatut naliliiffigineqanngilaq. Ullumikkut ukiumoortumik aningaasanut inatsisini inuussutissarsiutinik siuarsanermut aningaasaliissutissanik imikkoortitsisoqartareerpoq, taamatuttaarluq ingerlatsivik ullumikkut inuussutissarsiutinik siuarsaanissamut qinnuteqaatinik tigusisareerpoq suliaqartareerlunilu.

2023-mi aningaasanut inatsimmi kontomi pingarnermi 73.04.03, 8.276.000 koruunit taarsigassarsianut erniaqanngitsunut akilersugassaanngitsunullu, aamma kontomi pingarnermi 73.04.04, 5.477.000 koruunit taarsigassarsianut ernialinnut immikkoortinneqarput.

### **4. Inuussutissorsiornermi aningaasaqarnermut allaffisornermullu kingunerisassat**

Siunnersut nunalerinermut allaffissornikkut sunniuteqassangatinneqanngilaq. Naatsorsuutigineqarpoq nunalerinermik inuussutissarsiuteqartut piffissap ingerlanerani imminut napatinneqarput inuussutissarsiutinik siuarsaanissamut aningaasaliissutit ingerlasinnaalernissaannut, siunnersut iluaqutaassasoq.

### **5. Avatangiisinut, pinngortitamut inuillu peqqissusaannut kingunerisassat**

Siunnersuut avatangiisinut, pinngortitamut inuillu peqqissusaannut kinguneqarnissaa naatsorsuutigineqanngilaq. Siunnersut mingutitsinngitsunut allannguinissamut anikitsumik tapersiinissamik imaqarpoq, inuussutissarsiutinik siuarsaanissamut aningaasaliissutit nukissiutinik ataavartunik atuinissamut atortunik sananissamut tigusinissamulluunniit atorneqarsinnaammata.

### **6. Innutaasunut kingunerisassat**

Siunnersut innutaasunut toqqaanartumik kinguneqassanngilaq.

## **7. Kingunerisassat pingaarutililit allat**

Siunnersuut pingaarutilinnik allanik kinguneqassanngilaq.

## **8. Oqartussanut kattuffinnullu il.il. tusarniaaneq**

Siunnersuut [www.naalakkersuisut.gl](http://www.naalakkersuisut.gl) aqqutigalugu tusarniaanernut iserfissami piffissami 3. oktober 2023-imiit 31. oktober 2023-mut tamanut ammasumik tusarniaassutigineqarpoq.  
Aamma sunnersuut Savaatillit Peqatigiit Suleqatigiissunut, Nunalerinermut  
Siunnersorteqarfimmut, Nunalerinermut Siunnersuisoqatigiinnut aamma Kommune  
Kujallermut toqqaannartumik nassiunneqarpoq.

Tusarniaanermi akissuteqaatit tusarniaanermi akissuteqaatit pillugit allakkiami saqqummiunneqarput. Ilanngussaq 1 innersuussutigineqarpoq.

## **Siunnersuummi aalajangersakkanut ataasiakkaanut nassuaatit**

### *§ 1-imut*

Imm. 1-imut

Ukiumoortumik aningaasanut inatsimmi aningaasaliissutini inuussutissarsiummik siuarsaanissamut aningaasat, Naalakkersuisut ukiumi pineqartumi tunniussinnaasaat qanoq amerlatigisut atorneqarnissaannut sinaakkutissanik aalajangersaasoqarpoq. Tassalu aalajangersakkami Naalakkersuisut aningaasaliissutit saniatigut inuussutissarsiummik siuarsaanissamut tunniussisinnaanngitsut, kiisalu qinnuteqartut piumasaqaatinik nalinginnaasunik naammassinnissimagaluarunilluunniit inuussutissarsiummik siuarsaanissamut aningaasanik pissarsinissamut pisussaaffeqanngitsut allassimavoq.

Aamma aalajangersakkami allassimavoq, inuussutissarsiummik siuarsaanissamut aningaasaliissutit Inatsisartut inatsisaanni siunertaasut, nunalerinertermi aningaasaqarnertermi pitsannguisinnaasut, aammalu suliniutit siunissami ungasissumi Kalaallit Nunaanni piujuartitsiffiusumik tunisassiornertermi imminullu pilersornertermi annertusitisinnaasut iluanni taarsigassarsiatut imaluunniit tapiissutitut toqqaannartutut tunniunneqartassasut. Taamaalilluni suliniutit suliassallu, inuussutissarsiummik siuarsaanermut aningaasaliiffiqineqarsinnaasut tunngaviusumik siunissamut ungasissumut isiginniffiussapput.

Kisiannili tamatigut tamakkiisumik naliliisoqartassaaq, pingaartumillu iluarsaassinertermut atatillugu nunalerivimmi pineqartumi suliat pingarnerit nalingisa qiviarnissaat tunngavigineqartussaavoq.

Tassalu nunalerinertermi inuussutissarsiutinik siuarsaanermut aningaasaliissutit inuiaqatigiit aningaasaqarneranni sinneqartoornissamut iluaqutaanissaat kissaatigineqarpoq, tamatumalu saniatigut aaqqissuussinerup Kalaallit Nunaanni inuussutissanik tunisassiornerup annertusitisinnaaneranut periarfissanik atuinissamut iluaqutaassalluni.

### *§ 2-mut*

Imm. 1-imut

Aalajangersakkami Naalakkersuisut qanoq iliorlutik inuussutissarsiutinik siuarsaanissamut aningaasaliisinnaanersut aalajangersarneqarpoq. Ullumikkut periarfissaasut atuutsiinnarneqassasut, taakkulu kattunneqarsinnaanissaat siunnersuutigineqarpoq.

#### Nr. 1-imut

Taarsigassarsiat erniallit taaneqarnerini piumasaqaatit Naalakkersuisunit aalajangersarneqartut tunngavigalugit taarsigassarsiat akilersorneqarnissaat ernialersorneqarnissaallu eqqarsaatigineqarpoq. Maleruagassat atuuttut naapertorlugit taarsigassarsiat taakku annertoqatigiikkaarlugit, ukiumut 4%-inik erniaqartillugit akilersorneqassapput. Tamatumaa allanngortinnejarnissaa pilersaarutigineqanngilaq.

#### Nr. 2-mut

Taarsigassarsiat erniaqanngitsut akilersugassaanngitsullu piffissami atuuffigisaminni tamarmi erniaqassanngillat akilersorneqassanatillu, aammalu piffissap taarsigassarsiffiusup naanerani aatsaat utertillugit akilerneqassallutik. Taarsigassarsianik nalikilliliisarnermut maleruagassat maanna atuuttut atuutsiinnarnejarnissaat naatsorsuutigineqarpoq, taamaattumillu taarsigassarsiat taamaattut tigusisussap piumasaqaatinik naammassinnissinnaanera apeqquataalluni tapiissutinik annertuunik imaqarput.

#### Nr. 3-mut

Naalakkersuisut inuussutissarsiutinut siuarsaanermut aningaasaliissutinik toqqaannartumik tapiissutit tunniussisinnaanissaat siunnersuutigineqarpoq. Periarfissap taassuma pisuni nunalerinermut periusissiap naammassineqarnerani, aammalu tapiisutit piffissami sivisunerusumi inuiaqatigiinnut annertuumik malunniuteqassasut naliliisoqarpat, taamaallaat atorneqartarnissaa naatsorsuutigineqarpoq. Narsaatinik nutaanik pilersitsinikkut nunaminertanik naatitsivissanik annertusitisinermut, imaluunniit narsaatit naatitseqqiffissatut pitsangorsarneqarnerini, kussinilersorneqarnerini kalkilersorneqarnerinilu tamanna pisinnaavoq.

#### Nr. 4-mut.

Siunnersuutigineqarpoq inatsisit malillugit atuuttutuulli, inuussutissarsiutinik siuarsaanermut aningaasaliissutit assigiinngitsut ataqtigisiinneqarsinnaassasut. Tamanna pillugu maleruagassat erseqqinnerusut siunnersuummi § 2, imm. 2 malillugu nalunaarummi aalajangersarneqassasut naatsorsuutigineqarpoq.

#### Imm. 2-mut.

Aalajangersakkami allassimavoq, Naalakkersuisut maleruagassanik erseqqinnerusunik aammalu inuussutissarsiutinik siuarsaanermut aningaasaliissutit ataqtigisiinneqartarnissaannut kiisalu nammineq aallarniutissatut akiliutissanik akiliisarnissaq pillugit aalajangersaasinnaasut.

### *§ 3-mut*

#### Imm. 1-imut

Aalajangersakkami inuussutissarsiuutinik siuarsaanermut aningaasaliissutit taamaallaat inunnut ingerlatseqatigiiffinnulluunniit, Kalaallit Nunaanni nunalerinermik ingerlatsisinnaatitaasunut tunniunneqartassasut allassimavoq.

#### Imm. 2-mut

Aalajangersakkami siunertat assigiinngitsut, inuussutissarsiuutinik siuarsaanermut aningaasaliiffigineqarsinnaasut allattorneqarput. Allattukkat tamakkiinissaat allattuiffimmii siunertarineqanngilaq, kisiannili siunertat inuussutissarsiuutinik siuarsaanermut aningaasaliiffissat immikkoortikkuminarnerunissaat, kiisalu taakkunani inuussutissarsiuutinik siuarsaanissamut maleruagassanik aalajangersasarnerup oqinnerulernissaa siunertarineqarpoq.

#### Imm. 3-mut

Naalakkersuisut pisuni immikkut ittuni aappaasumut imaluunniit inooqataasumut ikuuttumut inuussutissarsiummik ineriartortsinissamut aningaasaliissutinik tunniussisinnaanissaat siunnersuutigineqarpoq. Kalaallit Nunaanni nunaleriffiit ilaasa ilaqtariinnit ingerlanneqartarnerat tamatumunnga tunngavilersuutigineqarpoq. Taamaattoqartillugu nunalerineq ataatsimoorluni ingerlanneqarluarpalluunniit, aappaasup imaluunniit ikiortasup piumasaqaatit nalinginnaasut naammassisimasariaqanngilai. Tassalu aalajangersakkami aalajangersarneqarpoq, aappaasoq inooqataasorluuniit ikuuttoq aamma inuussutissarsiummik ineriartortsinissamut aningaasaliissutinik qinnuteqarsinnaasoq. Aalajangersakkap taamaallaat pisuni immikkut ittuni atorneqartarnissaa naatsorsuutigineqarpoq, assersuutigalugu pikkorissarnermut ilinniaqqinnermulluunniit atatillugu.

### *§ 4-mut*

#### Imm. 1-imut

Nunalerineq qanoq paasisariaqarnersoq aalajangersakkami aalajangersarneqarpoq. Tassalu aalajangersakkami ingerlatseriaatsit nalinginnaasut pioreersullu pineqarput, taakkunani lu savanik piaqqiortitsineq atugaanerpaasapoq, kisiannili aamma taakkunani naasunik naatitsinerinnaq ilangunneqarpoq, taakkunungalu naatitat immamilu naatitsinerit ilaatinneqarput. Naatitanik illup iluani ikiorsersorluni naatitsisarneq, “indoor farming” Kalaallit Nunaanni aallartinneqarsimavoq, kiisalu immami naatitsinerit ilisimaneqarpiangillat. Taamaakkaluartoq immami naatitsinerit ilangunneqarput, taamaalillunilu taamaattunik suliaqalernissat siuarsarneqarsinnaalerput.

#### Imm. 2-mut

Inuussutissarsiuutigineqartutut isigineqarsinnaanissamut nunalerineq pingarnertut inuussutissarsiuutigineqassasoq, aalajangersakkami aalajangersarneqarpoq. Taamaattumik

nuannariinnarlugu nunalerineq imaluunniit nunalerinerup saniatigooralugu ingerlanneqarnera, siunnersummi pineqartunut ilaassanngillat.

#### Imm. 3-mut

Inuussutissarsiutinik siuarsaanerup inuussutissarsiutigalugu nunalerinermut atorneqarnissaa siunertaavoq, taamaattumillu nunalerinerup qanoq ilinerani inuussutissarsiutitut isigineqarsinnaalernissaanut killiliussat minnerpaaffissaannik aalajangersaasoqarpoq. Killiliussat minnerpaaffilerneqarnerini nalunaarusiat aammalu Naalakkersuisut nunalerinermut periusissiaat, kiisalu Savaatillit Peqatigiit Suleqatigiissut kissaataat tunngavigineqarput, aammalu ingerlatsiviit imminnut akilersinnaassagunik qanoq angissuseqarnissaannik naliliineq tunngavigineqarluni.

Piumasaqaat taanna nutaajummat, aammalu nunalerisunik piumasaqaatinik naammassinnissinnaanngitsunik peqareermat, 1. januaari 2030-p tungaanut, takuuk § 10, imm. 3, piffissaq ikaarsaarfiusussatut aalajangerneqarpoq. Tamatuma kingorna nunalerinerup inuussutissarsiutigalugu ingerlanneqartutut isigineqarsinnaanissaanut piumasaqaatit minnerpaaffissaat malinneqassapput.

#### Imm. 4-mut

Pisut ilaanni piumasaqaatit minnerpaaffissaannik naammassinninnissaq ajornarsimasinnaavoq. Tamanna nersutaatinik napparsimasoorermik, ingerlatsiviup allamut allanngortinneqarneranik, tunisassioriaatsit arlallit ataatsimoortinnerinik il.il. peqquteqarsinnaavoq. Taamaattumik Naalakkersuisut pisuni immikkut ittuni imm. 2-mi piumasaqaatit minnerpaaffissaannik saneqqutsisinjaapput.

#### Imm. 5-mut

Aalajangersakkami tunisassioriaatsinut allanut killiliussat minnerpaaffissaanik aalajangersaanissamut periarfissiisoqarpoq, assersuutigalugu ummimmannik uumasuuteqarneq.

#### Imm. 6-imut

Naalakkersuisut piumasaqaatit minnerpaaffissaasa nunaleriffinnik aallartitseqqinnernut, tigusinernut pilersitsinernulluunniit atuuttussaannginnerinut maleruagassanik aalajangersaasinjaapput.

#### *§ 5-imut*

Aalajangersagaq inuussutissarsiutinik siuarsaanissamut piumasaqaatinik tamanut atuuttunik imaqarpoq.

Aalajangersakkami tunngavissat, Naalakkersuisut inuussutissarsiuutinik siuarsaanissamut aningaasaliissutinut qinnuteqaatit akuerineqarsinnaanissaannut missiliuillutik naliliinermanni eqqarsaatigisassaat allattorsimapput. Qinnuteqaat akuerineqarsinnaassappat piumasaqaatit tamarmik naammassineqarsimasussaapput.

#### Nr. 1-2-mut

Qinnuteqartup inersimasuunissaanut, kiisalu § 3 naapertorlugu nunalerivimmik ingerlatsinissaanut, tigusinissaanut pilersitsinissaanullu piumasaqaatit piviusorsiortuupput. Tigusinermi imaluunniit kinguariit nikinneranni suleriaaseq malillugu piginnittuunermut uppernarsaat piumasaqaatalilik imaluunniit isumaqtigiiressut alla pigineqassapput, tassani inaarutaasumik tunniussineq taamaallaat taarsigassarsiat atutereersut tiguneqarnissaat imaluunniit nutaamik taarsigassarsisimanissaq, kisimik piumasaqaataassallutik.

#### Nr. 3-5-imut

Kingusinnerpaamik qinnuteqaatip akuerineqannginnerani qinnuteqartup pissutsinik taaneqartunik uppernarsaanissaa siunnersuutigineqarpoq. Piumasaqaatit nalinginnaasummata, pissutsit taakku allakkatigut qinnuteqaammut ilaatinneqartariaqarput, kisiannili qinnuteqaatip suliarineqarneranut atatillugu paassisutissanik amerlanerusunik tapiliussisoqarsinnaalluni. Qinnuteqartup pissutsinut taaneqartunut qanoq annertutigisumik uppernarsaanissaanut siunertaq suliassarluunniit, inuussutissarsiuutinik siuarsaanissamut qinnuteqaateqarfiusup suunera apeqqutaassaaq. Qalusissummik balle-nik poortukkanik isumagisaqarnermut atugassamik pisinissamut inuussutissarsiuutinik siuarsaanissamut qinnuteqaat imminermini paasinakannereerpoq, kisiannili narsaatinut aqqusinermik, kuuk ikertooq ikaarlugu ikaartarfittalimmik nutaamik pilersitsiniarluni qinnuteqaateqarnermi nassuaat itisiliiffiunerusoq pisariaqartinneqartussaavoq.

### *§ 6-imut*

#### Imm. 1-imut

Aalajangersakkami Naalakkersuisut § 1-imi siunertat ilaatinneqarsinnaasut saniatigut aamma qinnuteqartup taarsigassarsianik ernialinnik taarsiisinnaassusianik tamarmiusumik naliliinissaat aalajangersarneqarpoq.

#### Imm. 2-mut

Aalajangersakkami allakkatigut qinnuteqaateqartoqarnissaa, aammalu suut minnerpaamik ilaliunneqarnissaat pillugu piumasaqaatit aalajangersarneqarput.

#### Nr. 1-imut

Piumasaqaat taanna assersuutigalugu nunalerinermik ilinniarsimanermut upernarsaat, Savaatillit Peqatigiit Suleqatigiissut imaluunniit kommunip inuussutissarsiornermi siunnersortaaniit oqaaseqaat aqqutigalugu naammassineqarsinnaavoq.

Qinnuteqartoq ingerlatseqatigiiffiuppat, piumasaqaat ingerlatseqatigiiffiup nunalerinermik suliassanik ingerlatsisinnaasumik, aammalu aningaasatigut akilersinnaasumik ingerlatsisinnaasumik aqutsisoqarneranik sulisoqarneranilluunniit uppernarsaaneratigut naammassineqarsinnaavoq.

Aamma piumasaqaat qinnuteqartup qinnuteqarnissani sioqquullugu ukiuni arlalinni inuussutissarsiutigalugu nunalerinermik ingerlatsisimanerminut uppernarsaasiineratigut naammassineqarsinnaavoq.

#### Nr. 2-mut

Qinnuteqaammut ingerlatsinermut missingersuutit ilanngunneqassapput. Isertitat aningaasartuutillu suut missingersuusiorneqarsimanersut missingersuutini allassimassapput. Isertitat aningaasartuutillu qaugu pissarsiarineqarnissaat akilerneqarnissaallu naatsorsuutigineqarnersut takussutissiorlugit nassiunneqassapput. Ingerlatsinermut missingersuutit, missingersuusiornermut tunngavissanik imaqartut pisariaqartinneqartumik nassuiaasersugaassapput, taamaalillunilu suliassami aningaasaqarneq naliliiffingineqarsinnaassaaq.

#### Nr. 3-mut

Qinnuteqaammut ukiuni kingullerni pingasuni naatsorsuutit ilanngunneqassapput. Naatsorsuutini isertitat aningaasartuutillu suuneri takuneqarsinnaassapput. Naatsorsuutit nassuiaasersugaassapput, taamaalillunilu missingersuutit taaneqartut naliliiffingineqarsinnaassapput.

#### Nr. 4-mut

Qinnuteqartup pigisaminut nalilinnut tamarmiusumut takussutissiaq ilanngutissavaa, tassungalu pigisat nalillit, aningaaserivinnut akiitsut aningaasalersuinermilu iliuutsit allat, kiisalu pisortanut akiitsut ilaatinneqassapput.

Aalajangersakkami Naalakkersuisut qinnuteqartup pigisaanik nalilinnik tamanik misissuisinnaalernissaat siunertarineqarpoq. Taamaalilluni Naalakkersuisut qinnuteqartup siusinnerusukkut Namminersorlutik Oqartussaniit tapersiissutinik taarsigassarsiarititanillu taarsersuisinnaassusia piumassuseqarneralu naliliinerminnut ilaatisinnaassavaat.

#### Nr. 5-imut

Aalajangersakkami allassimavoq, taarsigassarsisoq akuersissutinik pisariaqartunik qinnuteqarsimassasoq, taakkulu ilanngullugit nassutiissagai. Taamaalilluni aalajangersagaq ingerlatsiviup qinnuteqaatinik, kingusinnerusukkut oqartussaasuniit akuersissutinik piumasarineqartunik pissarsiffiusinnaanngitsunik suliaqarnissamut piffissamik pisariaqanngitsumik atuisarnissaannik qulakkeereqataassaaq.

Taakku assersuutigalugu kommunimiit nunaminertanik atugassiinernut imaluunniit sananissamut akuersissutinut tunngasinnaapput.

#### Nr. 6-imut

Aalajangersakkami allassimavoq, qinnuteqartup nammineerluni akiligassarisinnaasaminik akiliisinnaanini uppernarsassagaa. Tamanna kontop allattorsimaffia, imaluunniit aningaaserivimmit aningaasalersuisumilluunniit allamit nammineerluni akiligassanut taarsigassarsitsisiniarnerannut uppernarsaatitut nalunaarut aqqutigalugu uppernarsarneqassaaq.

#### Nr. 7-imut

Suliassamut piumasaqaatit allat taaneqarnerini inatsisit piumasaqaatilluunniit allat, suliassamut pineqartumut piumasarineqartut eqqarsaatigineqarput. Aalajangersagaq aalajangersakkatut ataatsimoortitsiffiusutut eqqarsaatigineqarpoq, tassanilu qinnuteqartup suliassamut tunngatillugu pissutsinik tamanik misissuisimanissaata qulakkeernissaa siunertarineqarpoq. Tassalu aalajangersagaq tamatigut atorfissaqartariaqanngilaq, kisiannili assersuutigalugu illuliortoqassappat, inunnut akuersissutinik atuuttunik pigisalinnut sarfamut sakkortuumut atortunik ikkussuinissamut, kuuffilersuinissamut allanillu suliaqarnissamut atorneqartussaniit neqeroorummik pissarsiniartoqarsimanera allassallugu naleqquassinnaavoq.

#### Imm. 3-mut

Qinnuteqartup pigisaanik nalilinnik naliliineq piffissami qinnuteqarfiusumi pissutsit atuuttut tunngavigalugit pissaaq. Qinnuteqartup pigisaanut nalilinnut takussutissiaq sillimmasiisarfimmi imaluunniit eqqartuussivimmi il.il. suliamik aalajangiinermut tunngassuteqartut peqquaallutik nalorninartoqartinneqarpat, suliaq naammassitinnagu pissutsit taamaattut qinnuteqaatip naliliiffigineqarneranut ilaatinneqassanngillat. Tassalu aalajangersakkami qinnuteqartup piffissami pineqartumi aningaasaqarnikkut atugai uppernarsarneqarsimasut, naliliinissamut attuumassutilit aalajangerneqarnissaat siunertarineqarpoq, taamaattumillu nalornissutit taaneqartut naliliinermut ilaatinneqartussaanngillat.

#### Imm. 4-mut

Aalajangersakkami allassimavoq, qinnuteqaat nassiunneqartoq amigartoq naliliisoqarpat, Naalakkersuisut paasissutissanik allanik piumasaqarsinnaasut. Taamaalilluni paasissutissat allat suut Naalakkersuisut piumasarisinnaaneraat killilerneqannngilaq, taamaallaalli paasissutissat qinnuteqaammut nassiunneqartumut attuumassuteqassapput piviusorsiortuullutillu.

#### Imm. 5-mut

Aalajangersakkami Naalakkersuisut qinnuteqarnermi iserfissiamik digitaliusumik pilersitsisinnaanerat, kiisalu qinnuteqarnermi immersugassamik aaqqiissutissamilluunniit digitaliusumik atuinissamik piumasaqaateqarsinnaanerat tunngavissiuunneqarpoq. Maannarpiaq taamaallaat allakkatigut qinnuteqaateqarnissaq piumasarineqarpoq. Ukiut tulliuttut 2-3-t ingerlanerini aaqqiissutissatut taaneqartut atorsinnaalernissaat Naalakkersuisunit anguneqarsinnaassasoq naatsorsuutigineqarpoq.

#### Imm. 6-imut

Qinnuteqartoq pigismini nalilinni annertuunik allannguiteqartoqarpat erngerluni Naalakkersuisunut nalunaarnissamut pisussaaffilerneqassasoq siunnersuutigineqarpoq. Aalajangersakkami Naalakkersuisut qinnuteqaammik nalileeqqinnissamut periarfissinneqarnissaat, immaqalu pisuni ikuuussinnaanissaat qulakkeerniarneqarpoq. Tamatuma saniatigut tunngavissat tamakkiinngitsut tunngavigalugit inuussutissarsiutinik siuarsaanissamut neriorsuuteqartoqartannginnissaa qulakkeerniarneqarpoq.

### § 7-imut

#### Imm. 1-imut

Inuit imaluunniit ingerlatseqatigiiffiit tunngavissaqanngitsumik inuussutissarsiutinik siuarsaanissamut taarsigassarsianik tapiissutinilluunniit pissarsisimappata, Naalakkersuisut inuussutissarsiutinik siuarsaanissamut taarsigassarsianik atorunnaarsitsinissamut aamma tapiissutit taarserneqarnissaannut aalajangiisinnaapput.

Aalajangersakkami allassimavoq, taarsigassarsiat pappiaqqanut nalilinnut inatsisini tunngavissat nalinginnaasut naapertorlugit atorunnaarsinneqarsinnaasut. Tunngavissaqanngitsumik pissarsinerup oqaatigineqarnerani qinnuteqaammi inuussutissarsiutinillu siuarsaanermut aningaasaliissutit akilerneqarnerini piumasaqaatit atugassaritaasullu naammassineqartussat tamarmik eqqarsaatigineqarput.

Oqaatsip “-sinnaavoq” atorneqarnerani Naalakkersuisut atorunnaarsinngitsoorsinnaanerat taarsiinissamullu piumasaqanngitsoorsinnaanerat ammaanneqarpoq. Tamatumanili piumasarineqarpoq, taarsigassarsianik tapiissutinilluunniit pissarsisup pineqartup upperinnilluni pisimanissa, aammalu pissarsisup tunngavissaqanngitsumik taarsigassarsitinneqarnerata tapiiffigineqarneratalu ajornaatsumik iluarsineqarsinnaanissa.

Aalajangersagaq malillugu pineqaatissiisoqassanngilaq, kisiannili unioqquitsinerit sakkortuut, soorlu allakkatigut pinerlunnerit il.il. politiinut tunniunneqartarnissaat, aammalu Kalaallit Nunaanni pinerluttulerinermut inatsit malillugu pineqaatissinneqartarnissaat naatsorsutigineqarpoq.

#### Imm. 2-mut

Inuit imaluunniit ingerlatseqatigiiffiit, inuussutissarsiuutnik siuarsaanissamut taarsigassarsianik tapiissutinilluunniit pissarsisut aningaasaqarnerminnut tunngasut pillugit Naalakkersuisunut ilisimatitsisussaatitaapput. Ilisimatitsisussaatitaaneq taamaallaat paasissutissat Naalakkersuisunit pigineqareersut allanngornerinut tunngasuuvvoq.

Allannguutit annertuut taaneqarnerini allannguutit, inuussutissarsiuutnik siuarsaanissamut taarsigassarsiat taarsersornerinut periarfissanik sunniisinnaasut pingartumik eqqarsaatigineqarput.

Aningaasaqarnermi pissutsit taaneqarnerini inuussutissarsiornermi sulinermiluunniit pissutsit, soorlu inussutissarsiuutip unitsinneqarnera, napparsimaneq, aammalu ingerlatseqatigiiffinnut tunngatillugu assersuutigalugu piginnittunik allanngortoqarnera eqqarsaatigineqarput.

#### Imm. 3-mut

Imm. 2 naapertorlugu nalunaaruteqanngitsoorneq sumiginnaanertut isigineqarpoq, taamaattumillu taarsigassarsiat atorunnaarsinneqarnerinik aamma taarsigassarsiat tapiissutilu taarserneqarnissaannik piumasaqaateqarnermik kinguneqarsinnaapput. Oqaaseq “-sinnavoq” toqqarneqarpoq, taamaalillunilu Naalakkersuisut missiliuisinnaapput taamaalillutilu pisuni immikkut ittuni taarsigassarsiat atorunnaarsinnagut imaluunniit utertillugit akilerneqarnissaat piumasaqaatigingngitsoorsinnaallugu. Assersuutigalugu inuussutissarsiuutnik siuarsaanermut aningaasaliissutinik pissarsisup napparsimanini peqqutigalugu imaluunniit piaaraluni nalunaanngitsoornera assigiinngillat.

#### § 8-mut

Siunnersuutigineqarpoq, Inatsisartut inatsisaanni sinaakkusiussat iluanni Naalakkersuisut malederuagassanik allanik aalajangersaasinnaanissamut piginnaatinneqassasut, tamannalu eqaannerusumik aaqqiisinnaanissamik kissaateqarnermik tunngaveqarpoq. Taamaalilluni

Naalakkersuisut inuussutissarsiorfiusup iluani ineriartortitsinissamut, Naalakkersuisut ineriartornermik siuarsaassallutik unikaallatsitsissallutiluunniit soqutigisaqarfigisaannut maleruagassiornissamut periarfissaqalissapput.

Imm. 1-imut

Nr. 1-imut

Siunnersuutigineqarpoq, Naalakkersuisut inuussutissarsiutinik ineriartortitsinissamut taarsigassarsisarnerit pillugit nalunaarutikkut pissutsit tamaasa pillugit piumasaqaatinik aalajangersaasinnaalissasut.

Nr. 2-mut

Siunnersuutigineqarpoq, Naalakkersuisut qinnuteqartunut suliassanullu ilinniartitaanermut, aningaasaqarnermut teknikkimullu piumasaqaatinik aalajangersaasinnaalissasut.

Taamaalluni ilisimasat nutaat tunngavigalugit inuussutissarsiutinik siuarsaanissamut aningaasaliissutinik tunniussinissamut maleruagassanik piumasaqaatinillu ingerlaavartumik aalajangersaasoqarsinnaanera qulakkeerneqassaaq.

Nr. 3-mut

Siunnersuutigineqarpoq, inuussutissarsiutinik siuarsaanermut aningaasaliissutit pillugit neriorsuummi atugassarititaasussat pillugit maleruagassanik Naalakkersuisut aalajangersaasinnaasut. Inatsimmi tunngavissaq taanna, assersuutigalugu atugassarititaasut suut nunalerinermut aalajangersimasumut tamatigut aalajangersarneqartassanersut pillugu maleruagassanik aalajangersaanermut, atorneqarsinnaavoq.

Imm. 2-mut

Nr. 1-imut aamma 2-mut

Siunnersuutigineqarpoq, Naalakkersuisut taarsigassarsinissamut tapiiffigineqarnissamullu neriorsuuteqarnermut atatillugu piumasaqaatinik tamanut atuuttunik piumasaqarsinnaassasut. Suliassat pillugit nalunaarusiornissamut piumasaqaataasinnaapput, imaluunniit piumasaqaatinut kinaassusersiorfiunngitsunut, aammalu inuussutissarsiummik siuarsaanissamut imaluunniit tapiissutit taarsigassarsialluunniit pitsaanerpaamik atorneqarnissaasa qulakkeerneqarnissaannut tunngasinnaapput. Assersuutigalugu Naalakkersuisut nersutinik piaqqiortunik pisinissamut inuussutissarsiornermut siuarsaanissamut taarsigassarsitsinissamut, tigusisussap piaqqiortitsinissamut pilersaarusiamut peqataanissaa piumasaqaatigisinnaavaat.

#### § 9-mut

Siunnersuutigineqarpoq, Naalakkersuisut Inatsisartut inatsisaat manna naapertorlugu suliassanik aqutsinermik pisortani oqartussaasunut allanut sullissivimmulluunniit

namminersortumut suliakkiisinnaassasut. Aalajangersagaq ilaatigut suliassanik, tamanna pillugu kissaateqarneq isumalluuteqarnerluunniit apeqquaallutik kommuninut tunniussinermut atorneqarsinnaassaaq.

Imm. 2-mut.

Suliassat sullissivinnut namminersortunut suliakkiissutigineqassappata, pisortat ingerlatsineranni suliassat suliarineqartarnerat pillugu Inatsisartut inatsisaat aamma pisortat ingerlatsinerat pillugu paasinneqarsinnaatitaaneq pillugu Inatsisartut inatsisaat sullissiviup suliassaqarfimmi pineqartumi aqtsinermut atorneqassapput.

#### *§ 10-mut*

Imm. 1-imut

Siunnersuutigineqarpoq, Inatsisartut inatsisisaat 1. januaari 2025-mi atuutilissasoq

Imm. 2-mut.

Inatsisartut inatsisaata atuutilerneratigut nunalerinermik inuussutissarsiornerup siuarsarneqarnissaa pillugu Inatsisartut inatsisaat nr. 6, 2. december 2009-meersoq atorunnaassaaq.

Imm. 3-mut

Siunnersuutigineqarpoq, § 4, imm. 3-4 tunisassiornerup minnerpaaffissaanut piumasaqaatinut tunngasoq, 1. januar 2030 atuutilissasoq.

Imm. 4-mut.

Inuussutissarsiutinut tapersiisarneq pillugu Inatsisartut inatsisaat nr. 4, 20. november 1984-imeersoq aamma aalisarnermut, piniarnermut nunalerinermullu tapersiissutit pillugit Inatsisartut peqqussutaat nr. 10, 12. november 2001-imeersoq, kiisalu nunalerinermik inuussutissarsiornerup siuarsarneqarnissaa pillugu Inatsisartut inatsisaat nr. 6, 2. december 2009-meersoq naapertorlugit akiligassanut suli inatsit atuuttuusimasoq malinneqassaaq.

## **Tusarniaanermut akissuteqaatinut allakkiaq**

Siunnersuut piffissami 3. oktober - 31. oktober 2023 www.naalakkersuisut.gl-imi tusarniaanermut nittartakkami tamanut saqqumitinneqarpoq. Tamatuma saniatigut siunnersuut Savaatillit Peqatigiit Suleqatigiissut (SPS), Nunalerinermik Siunnersorteqarfimmum, Nunalerinermut siunnersuisooqatigiinnut aamma Kommune Kujallermut toqqaannartumik nassiuinneqarpoq.

Makkuningga tusarniaanermut akissuteqaat tiguneqarpoq:  
Kommune Kujalleq, Savaatillit Peqatigiit Suleqatigiissut (SPS), Nunalerinermik Siunnersorteqarfik, Asiarpa Motzfeldt, Stefan H. Magnusson aamma Sulisitsisut.

Tulliuttuni tusarniaanermut akissuteqaatit tusarniaanerup nalaani tiguneqartut sammineqarput. Oqaatigineqassaaq tusarniaanermut akissuteqaatit uingasumik allassimammata, aammalu tusarniaanermut akissuteqaatit pingaaruteqarnerannik naliliineq tunngavigalugu pingarnersiorlugit issuarneqarlutik.

### **Kommune Kujalleq**

*Siunnersuummut annertunerpaatigut akuersaарpoq aammalu oqaatigalugu imarisamigut Qaqortumi isumasioqatigiissitsinermi saqqummiunneqartunut naapertuttoq.*

*Taamatuttaaq oqaatigineqarpoq Kalaallit Nunaata inuussutissanut suliassaqarfip iluani, ilanngullugu nunalerinermut suliassaqarfimmi, imminut pilersornerulermissaa Naalakkersuisut kissaatigimmassuk, aammalu inatsisissatut siunnersuummi inuussutissarsiutinut tapersiivigineqarnissamut piumasaqaatit sukaternissaannut alloriartoqarmat, tamanna neriuurnarnartoq, taamaalilluni inuussutissarsiorneq sunniuteqarluarnerulissalluni, piujuartitsiviunerulissalluni imminullu akilersinnaanerulissalluni.*

*§4 ataani pingarnertut tunisassiornermut piumasaqaatit minnerpaaffissaannik aalajangersaasoqarnissaa Kommune Kujallermiit isumaqatigineqarpoq. (Maannakkut § 10, imm. 4).*

*Kommune Kujalleq siunnersuutinik pitsasunik arlalinnik, Naalakkersuisut nunalerinermut periusissiaanik atuutsitseqataalersinnaasunik kiisalu nunalerinermik inuussutissarsiuteqarnermik imminut akilersinnaanerulersitsisussanik, allataqarpoq.*

Kommune Kujalliuup siunnersuut neriuurnartutut isigimmagu Naalakkersuisut nuannaarutigaat aammalu suliniutissanut allanut tunngatillugu kommunip akuutinnissaa aammalu siunnersuutit aalajangersimasut atuutsinnissaat pillugu oqaloqatiginissaa naatsorsuutigalugu.

**Savaatillit Peqatigiit Suleqatigiissut (SPS) - De Samvirkende Fåreholderforeninger**  
*SPS allappoq, siunnersuummi § 4, imm. 2, nr.1-imi savat piaqqiortussat amerlassusaat savat piaqqiortussat 400-niit 350-inut ikilisinneqartariaqaraluartut.*

Tassunga tunngatillugu oqaatigineqassaaq, 1. januar 2030 uumasuutit ikinnerpaaffissaannut piumasaqaammi siunnersuutigineqartumi, tunissiornerit assigiinngitsut imminut akilersinnaalernissaminut qaqgukkut naammattumik amerlassuseqalertarnersut, naliliineq aallaavigineqarmat. Savaateqarnermi naliliisoqarpoq tamatumani savat piaqqiortussat minnerpaamik 400-nissaat pisariaqartoq. Inuussutissarsior tut taamatut nalilersueqataapput. Ukiuni kingullerni akigitat qaffakkiartorneranni piumasaqaatit minnerpaaffissaat taanna appatinneqartariaqanngikkaluarpoq. Taamaattumik savat piaqqiortussat amerlassusissaannut piumasaqaatip allangortinnissaa Naalakkersuisut pissutissaqarsorinngilaat.

*SPS aammattaaq allappoq, siunnersuut, siunnersuummit Naalakkersuisut 2023-mi  
aasaanerani isumasioqatigiissitsineranni/ataatsimeersuartsineranni  
saqqummiunneqartumit, annertuumik allaanerusoq, tamatumanilu piffissaq tusarniaaffiusoq  
sivitsorneqartariaqaraluartoq, tassani amigaateqarsorinarmat.*

Eqqorpoq, missingiutip SPS-imut allanullu soqutigisaqartunut nunalerinermut suliassaqarfimmi inatsisissatut siunnersuutissaq eqqarsaatigineqartoq pillugu Naalakkersuisut isumasioqatigiissitsineranni takutinneqartup kingorna siunnersuummi allangortitsisoqartoq. Pissutsit isumasioqatigiinnermi tassani oqallisigineqartut, allanguutinut arlalinnut taakkununnga pissutaapput, ilanngullugu pingaartumik maleruagassat pisariinnerulersinneqarnissaannik kissaateqarneq kiisalu ineriaartortsinerup nukittorsarnissaanut tunngatillugu sukkasumik qisuarisrinnaanissaq. Kissaatigineqartut taakkua inatsimmi immersugassami isumagineqarpata oqinnerpaajusussaavoq, tassani inuussutissarsiuutnik siuarsaanermut angusaqarsinnaanissamut pingarnertigut tunngavissarititaasut piumasaqaatillu aalajangersarneqarlutik, atugassarititaasut immikkullarissut nalunaarutitut ilusilimmi aalajangersarneqarlutik. Taamaattumik inatsisissatut siunnersuut saqqummiunneqarpoq, siusinnerusukkut inatsimmi ilaatinneqartut ilai siunissami nalunaarummi aalajangersarneqartussanngorlugit.

Taamaattumik killissaliussanut piumasaqaatit annertuumik allangortinneqanngillat, kisianni siunnersuut naannerulerluni.

Nalunaarutit pisariaqartut taakkua taamatuttaaq tamanut ammasumik tusarniaassutigineqassapput, taamaattumik tusarniaanerup matuma sivitsorneqarnissaa Naalakkersuisut pissutissaqarsorinagu.

### ***Nunalerinermik Siunnersorteqarfik***

*Nunalerinermik Siunnersorteqarfik taamatuttaaq allappoq tusarniaaneq  
sivitsorneqartariaqaraluartoq, tassami siunnersuut, missingiummit 2023-mi aasaanerani  
isumasioqatigiissitsinermi saqqummiunneqartumit, annertuumik allaanerorpasimmat.*

Matuma siuliani allassimasutut eqqorpoq missingiut 2023-mi aasaanerani isumasioqatigiissitsinermi saqqummiunneqartoq, siunnersuummit tusarniaassutigalugu nassiunneqartumiit, allaanerusoq. Taamatut allangortitsineq inatsimmik piareersaalluni suliaqnermut ilaati llugu ingerlanneqarpoq, tassani 2023-mi aasaanerani isumasioqatigiissitsinermit akerliliissutigineqartut ilaati gut pingaarutilittut ilaatinneqarlutik. Pissutsit isumasioqatigiinnermi tassani oqallisigineqartut, allanguutinut arlalinnut taakkununnga pissutaapput, ilanngullugu pingaartumik maleruagassat

pisariinnerulersinneqarnissaannik kissaateqarneq kiisalu ineriartortitsinerup nukittorsarnissaanut tunngatillugu sukkasuumik qisuariarsinnaanissaq.

Kissaatigineqartut taakkua inatsimmi immersugassami isumagineqarpata oqinnerpaajusussaavoq, tassani inuussutissarsiutinik siuarsaanermut angusaqarsinnaanissamut pingaarnertigut tunngavissarititaasut piumasaqaatillu aalajangersarneqarlutik, atugassarititaasut immikkullarissut nalunaarutitut ilusilimmi aalajangersarneqarlutik. Taamaattumik inatsisissatut siunnersuut saqqummiunneqarpoq, siusinnerusukkut inatsimmi ilaatinneqartut ilai siunissami nalunaarummi aalajangersarneqartussanngorlugit.

Nalunaarutit pisariaqartut taakkua taamatuttaaq tamanut ammasumik tusarniaassutigineqassapput, taamaattumik tusarniaanerup matuma sivitsorneqarnissaa Naalakkersuisut pissutissaqarsorinagu.

*Taamatuttaaq siunnersorteqarfik allappoq, siunnersuummi saqqummiunneqartumi inatsimmik atuutereersumik annertuumik ingerlatitseqqiinerusoq pillugu siunnersuut nassuaatillu imminut ataqtigiinngitsut, tassami taanna siunnersuutip akuerineqarnerani atorunnaarsinneqartussaammat.*

Siunnersuummi aaqqissuussineq atuutereersoq allanngortinnejingilaq, taanna malillugu nunalerinermut inuussutissarsiutinik siuarsaanermut, aningaasanut inatsimmi aningaasaliissutit tunngavigalugit taarsigassarsisitsinertut imaluunniit tapiissutit imaluunniit taakkua ataqtigiissillugit, ikiorsiisoqarsinnaalluni. Siunnersuummi aaqqissuussinerup atuutereersup annertuumik allanngortinnejingilaq nassuaasarniq nutaat tunngavigalugit taanna nutarterneqarnersoq, siunnersuummi nutaami nassuaasarniq nalinginnaasuulluinnarpoq.

### ***Sulisitsisut (GE)***

*GE allappoq inuussutissarsiutinut pingaernerpaatigut piujuartussaanngitsunut tapersiisoqartarnissaa isumanerluutigalugu. Peqatigisaanik GE allappoq, siunnersuutip inuussutissarsiutip imminut akilersinnaanerulersinnissaanik siunertaqarnera, neriuulluarnartutut isigalugu.*

Naalakkersuisut oqaatigaat, siunnersuummi inuussutissarsiutip imminut akilersinnaanerulersinnissa, taamaallunilu piujuartitsiviunerulernissaa, siunissamilu imminut pilersornerulernissamut iluaqutaanissaa, siunertarineqartut.

### ***Asiarpa Motzfeldt (AM)***

*AM allappoq, nunaatillit ilinniartitaanerannut piumasaqaatit sukannererusut piumasaqaatigineqartariaqarluartut, tassami pisuni arlalinni pitsaanerpaamik naggorissaasoqanngitsoq, katersisoqanngitsoq nerukkaasoqanngitsorlu takuneqartarmat.*

Naalakkersuisut oqaatigaat siunnersuummi nunaatilinnut ilinniartitaanermi piumasaqaatit maleruagassiivigineqanngitsut. Taamaattoq siunnersuummi inuussutissarsiutinik siuarsanissaq pillugu qinnuteqarnermut atatillugu atugassarititaasunik piumasaqaateqarnissaq periarfissinneqarpoq, tassani ajornartorsiutit taaneqartut ilai

pakkersimaarniarneqarsinnaassallutik. Tamatuma saniatigut nunaatillit nunaatiminnit pitsaanerpaamik pissarsiaqarnissaannut uumasuutiminnillu paarsinissaannut tunngatillugu ikiornissaat Nunalerinermik Siunnersorteqarfiup suliassarigaa.

*AM allappoq suliassaqarfimmi inatsisip ilaa pisoqaanerusoq aammalu nutarterinissaq pisariaqartinneqarpasittoq.*

Naalakkersuisut Nunalerinermut Periusissiaat 2021 – 2030 naapertorlugu maleruagassat nutarterneqarnissaat Naalakkersuisut qimerluulerutterpaat. Siunnersuut manna nutarterinerup taassuma ilagaa.

*AM allappoq, inuussutissarsiutinut siuarsaanermut atugassarititaasut pitsangorsarneqartariaqaraluartut, ilanngullugu pingaartumik piffissamut akilersorneqarnissaannut ernianullu tunngatillugu.*

Inuussutissarsiutinik siuarsaanermut taarsigassarsiarititat ullumikkut atugassarititaasut iluaqusiisussat tunngavigalugit tunniunneqartareerput. Siunnersuummi suleriaaseq taanna ingerlateqqinnejqarpoq, taamaattoq inuussutissarsiornermut tassunga pigisaq nalilik taanna kissaatigineqartoq imminut akilersinnaassuseqarnerulersitseqataassanersoq, ingerlatsiviup tapersiinissamut nalilersuinermiini isigniartussaallugu.

***Stefan H. Magnusson (Isortoq Reindeer Station)***

*Isortoq Reindeer Station ilaatigut tuttuuteqarnermut periusissianik siunnersuutigineqartunik arlalinnik allappoq aammalu tuttuutillit allatuulli periarfissaqartariaqaraluartut allalluni.*

*Tamatuttaaq nunalerinermik inuussutissarsiuteqarnerup nalinginnaasumik ineriartortinnejqarnerata iluani pingaarnertigut periusissatigut periarfissat arlallit allanneqarput.*

Naalakkersuisut Nunalerinermut Periusissiaannik 2021 – 2030, aamma tuttuuteqarnermut tunngassuteqartumik, siunnersuut atuutsitseqataalissaaq. Nunaatillit tamarmik, ilanngullugit tuttuutillit ilaalu ilanngullugit, siunnersuut manna malillugu inuussutissarsiutinik siuarsanissaq pillugu qinnuteqarsinnaassapput.

Tusarniaanermut akissuteqaat tusaatissatut tiguneqarpoq, kisianni siunnersuummi allanngortitsinissamut pissutissaqalersitsinani, tassami tusarniaanermut akissuteqaat annertuumik pingaarnertigut periusissatigut ineriartortitsinermut suliassaqarfinnut tunngatinneqarmat aammalu siunnersummut pineqartumut tunngatinneqarani.